

適園叢書

張宗祥



通國書畫



張大千

唐大詔令集卷第五十五

宋 宋敏求編

大臣

宰相

罷免上

長孫無忌開府儀同三司制

李靖特進制

魏徵特進制

王方慶麟臺監監修國史制

姚元之相王府長史制

張說停中書令制

源乾耀停侍中制

裴耀卿張九齡尚書左右丞相制

陳希烈太子太師制

呂譔太子賓客制

缺

姜公輔太子左庶子制

缺

李勉太子太師制

盧翰太子賓客制

崔造太子右庶子制

盧邁太子賓客制

趙宗儒太子右庶子制

鄭珣瑜吏部尚書高郢刑部尚書制

鄭餘慶太子賓客制

鄭綱太子賓客制

李藩太子詹事制

權德輿禮部尚書制

李絳禮部尚書制

韋貫之吏部侍郎制

長孫無忌開府儀同三司制

昔東漢功臣莫任機揆西京戚里咸存退讓故能長守富貴
不懼危殆尚書右僕射齊國公無忌神識清舉風彩凝映賢
戚之望朝野所推比軒禁不虞釁生慮表倉卒之間厥功以
茂自居樞要聲實俄遠然以椒掖之親處權衡之地深知止

足有戒滿盈收衽之請言辭懇切宜遂其心以勵貪競可解

尚書右僕射仍進散位開府儀同三司

貞觀二年正月

李靖特進制

高秩厚禮允屬茂勳貴德崇讓用光彝典尚書右僕射代國公靖器識恢弘風度冲邈早申期遇夙投忠款宣力運始效績邊隅南定荆揚北清沙塞皇威遠暢功業有成及參聞政本職重端副綢繆翼贊勤勞寔績知無不爲歲寒彌厲旣懷冲挹以疾固辭表疏懇至情理難奪煩以吏職有乖養賢宜加優寵申其雅志可特進封如故并賜物一千段上乘馬兩匹祿賜國官府佐及親事帳內防閑等並依舊給患若小瘳每三兩日至門下中書平章事患若未除任在第攝養

貞觀八年

十一月

魏徵特進制

留侯名相濟北之志已高疏傳人師東都之迹彌遠後進仰其遺烈前榮以爲美談諒可以砥節厲行化俗弘風者也左光祿大夫侍中鄭國公魏徵器量沈敏軌儀詳正文史優贍學業該通自參贊機衡綢繆帷幄知無不爲心力備盡格言弗隱正議日聞一德載宣四聰斯達實賴嘉猷用宣治道而深執謙損志懷沖退詞誠懇切良用撫然杼軸於懷屢移氣序而固陳丹款義在難違今便申其雅志成厥口美可特進封如故仍知門下事朝章國典參議得失自徒流以上罪詳事奏聞其祿賜及國官防閤等並同職事

貞觀十六年丹

王方慶麟臺監監修國史制

鸞臺芒閣祕文蓬山奧府是爲國重尤切帝難銀青光祿大夫行鳳閣侍郎同鸞臺平章事上柱國石泉縣開國子王方慶鍾鼎高門簪纓舊德學富今古才優舒向自參機密亟改涼暄謦諤之風不忘於獻替謙挹之美屢陳於衰疾西垣掌事雖藉謀猷東觀屬詞更資通博宜掇鳳凰之省俾緝麒麟之署可麟臺監仍監修國史勳封如故主者施行

聖歷元年八月

姚元之相王府長史制

忠爲令德孝乃天經義著君親道存敬愛其或兼者可不美歟銀青光祿大夫行鳳閣侍郎兼檢校相王府長史同鳳閣鸞臺三品姚元之自掖垣趨侍廊廟謀猷竭忠盡誠讜言正

議始終無替弘益以多近以母氏衰老情兼喜懼在休沐之期闕晨昏之禮乞解所職以就閒養外奏內請志到詞勤宜遂懇情用敦孝道睠彼藩邸高選經佐俾從梁苑之游以致潘園之樂可行相王府長史一事以上並同三品

長安四年六月

張說停中書令制

門下特進行尚書右丞相兼中書令燕國公張說往屬艱難輸誠於履險及茲輔相潤色於告成而不肅細微之人頗乖周慎之旨朕略小在大念舊錄功且法不欲屈宜罷中樞之務義亦有在更全端右之榮宜停中書令仍將國史於宅修撰主者施行

源乾耀停侍中制

尚書右丞相兼侍中源乾耀十載持衡一心自牧台鼎斯重
管綜維繁雖勤力在公而暮年微疾俾司端揆罷劇中樞宜
停侍中其尚書左丞相如故

開元十七年六月

裴耀卿張九齡尚書左右丞相制

門下燮和陰陽儀刑端揆自非人傑孰副僉諧金紫光祿大
夫侍中弘文館學士上柱國稷山縣開國男裴耀卿才實國
楨望爲人範懷匪躬之節竭奉上之心金紫光祿大夫中書
令集賢院學士修國史上柱國始興縣開國子張九齡器識
宏遠文詞博達負經濟之量有謀猷之能自翼贊台階彝倫
有序直道之心彌固謇諤之操逾堅並可以儀刑百寮緝熙
庶績宜迴掖垣之任俾列官師之長耀卿可守尚書左丞相

九齡可守尚書右丞相散官勳封如故主者施行

開元二十四年十一月

陳希烈太子太師制

門下輔道元良發明純德朝寄之重莫此爲先特進行左相兼武部尚書集賢殿弘文館學士崇玄館大學士太清諫曹爰資敏才參掌密命居易勵脩身之操見危著從我之勤自處台司累疏陳乞忌滿思退持盈守謙留中六之重難其請用式撫挹俾尹宮坊可太子左庶子賜如故

興元元年四月

李勉太子太師制

陸贄

敕立國之本所繫於元良弘教之方必由於端士非識精前典德重當時恭敬溫文其德安倣吾是以輟台階之老選宗

望之賢輔翼春闈是資教諭光祿大夫檢校司徒平章事汧國公李勉忠信孝友直方簡儉達君臣父子之際知禮樂教化之端虛襟保和清明簡欲求舊則德茂序親則屬尊師範國儲無易其選可依前檢校司徒兼太子太師貞元二年正月十一日

盧翰太子賓客制
陸贄

敕求賢審官以康庶績就閒優秩以處舊臣蓋欲敦始終之恩全進退之禮金紫光祿大夫門下侍郎同中書門下平章事范陽郡公盧翰頃因多難從我於征以其年乃老成仕推先進方將求舊擢處公衡荏苒迄今再淹星歲勤勞旣著衰疾有加宜從職於春闈用優賢於暮齒可太子賓客散官勳

封如故貞元二年正月

崔造太子右庶子制

陸贄

敕宰相之職允釐百工時惟仰成不可廢闕中散大夫行給事中同平章事上柱國平安縣男賜紫金魚袋崔造頃在掖垣參贊樞務總領煩重積勤彌深亦旣優賢賜之長告歲聿云暮有加無瘳披誠自陳羣疏三上知止之道守之甚堅處於休閒遂其頤養可太子右庶子散官勳封如故

貞元二年十二月

盧邁太子賓客制

任重謨猷道存忠諒辭疾之情旣懇優賢之意斯崇中書侍郎平章事盧邁朝序公才操履端敏弼諧庶政夙夜惟寅恭恪之心每思獻納而支體未適固請優閒累表固陳懇誠彌切將遂其志予衷耿然爰舉朝章式加命秩可太子賓客

貞元

十三年
九月

趙宗儒太子右庶子制

任人之道必在無私審官之宜所期適用給事中平章事趙宗儒早以文學累更職任自居樞近頗歷歲時雖夙夜載勤而政理猶鬱式移秩序以協朝經可太子右庶子

貞元十四年七月

鄭珣瑜吏部尚書高郢刑部尚書制

朕承天眷命獲主兆人思致邕熙用康區夏布和緝化屬在輔臣所謂適宜實爲通典銀青光祿大夫守吏部尚書平章事上柱國鄭珣瑜銀青光祿大夫守刑部尚書平章事上柱國高郢等咸以忠靖累更班列秉彝廉慎植操貞常自參輔中樞皆能礪節祗勤庶務夙夜惟寅歲月滋深嬰纏疾

恙袞職有闕無以彌綸況銓綜爲選士之本刑法乃生人之
命俾從專掌以盡至公宜輟台司副予所委珣瑜可吏部尙
書郢可刑部尙書

永貞元年三月

鄭餘慶太子賓客制

御大器者本於至公服大寮者歸於眾望故上無虛授下允
具瞻苟異於斯則曠邦理朝請大夫守尙書左丞同中書門
下平章事輕車都尉賜紫金魚袋鄭餘慶嘗以懿文累更近
侍亦以讜議出佐遐藩恭承宣室之召再處廟堂之任丞相
所請朕無不從勞於虛襟亦旣周月寂寥厥位不聞直聲昔
魏相持綱樞機周密左雄匡政朝廷肅然總錄之司輕重攸
繫苟云不稱亦在量能俾從調護之班猶示優崇之寵可守

太子賓客散官勳如故

元和元年十一月

鄭綱太子賓客制

門下王者重輔弼之任明進退之宜見可卽升知否則捨茲
朕所以推職不惑與物無私者也銀青光祿大夫守門下侍
郎同中書門下平章事兼弘文館大學士上柱國賜陽武縣
開國侯鄭綱早以令聞入參禁署永推勤績出授台司期爾
有終匡予不逮歲月滋久謀猷寢微罔清淨以愼身每因循
而保位旣乖素履且鬱皇猷宜副羣情罷茲樞務朕以其久
居內職累事先朝恩厚君臣貴令終始俾就優閒之秩用申
寬大之恩可太子賓客散官勳封如故主者施行

元和四年二月

李藩太子詹事制

爰立輔臣以熙庶績聿膺其任亦曰難能至於明用舍之宜
全始終之道茲惟大體寧忘予懷中散大夫守門下侍郎同
中書門下平章事兼弘文館學士上柱國賜紫金魚袋李藩
早以學行聞於搢紳洎升朝端克愼素履頃者拔於非次列
在鈞衡是宜直己以佐時匪躬而納誨用副明獎越於常倫
而授任以來再踰年序夙夜之勤雖著弼諧之效未孚將何
以允至公之求成天下之務宜輟黃樞之重尙居端尹之崇
爾其勉之式謂優禮可守太子詹事散官勳賜如故

元和六年二月

權德輿禮部尙書制

文昌六官宗伯掌禮選授之重自昔攸難非夫台衮之臣分
全於終始搢紳之義素洽於羣倫則無以允是優崇膺茲名